

Edukado al tutmonda konscio per Esperanto

KOBAYASHI Tsukasa

Universala Esperanto-Asocio

Mi deziras uzi la vorton *edukado* ne nur por la edukado en la lernejo, gimnazio aŭ universitato, sed ankaŭ celante edukadon por ĉiuj lernantoj dum tutviva daŭro. Antaŭ 74 jaroj, en 1922, *Internacia Konferenco pri Esperanto en Lernejoj* okazis en la Palaco de Ligo de Nacioj en Ĝenevo, kies sekretario, D-ro Nitobe kaj aliaj, ĵus preparis raporton pri la sama temo. La konferencon partoprenis cent da instruistoj kaj profesoroj el 28 landoj.

La Konferenco deklaris jenan konkludon el la sperto en la 250 urboj tutmondaj:

1. Instruado de Esperanto helpis la infanojn pli profunde koni sian lingvon;
2. Kiel la unua fremda lingvo, Esperanto estas facila. Tial la duan fremdan lingvon oni poste lernos pli kuraĝe kaj pli sperte kiam oni jam sukcesis pri la unua. Anstataŭ perdiĝi tempon, la instruado de Esperanto ŝparus tempon por instrui fremdajn lingvojn;
3. Esperanto helpis lernadon de geografio kaj pac-edukado per internacia korespondado. La lernantoj komprenis ke oni devas akcepti alian kulturon.

La Konferenco okazis jam antaŭ 74 jaroj. Tiam ankoraŭ internacieco estis ne tiel populara kompare kun la nuna situacio. La Konferenco estis certe tro frua, de nuna vidpunkto.

La internaciigo kreskis tre rapide lastatempe. Pro la evoluo de la aviadilo multaj vojaĝantoj vizitas eksterlandon. En la 1994-a jaro, ĉirkaŭ 10 procentoj de la tuta japana loĝantaro vojaĝis eksterlanden (precize 13,579,000 japanoj!). Pro la plimultiĝo de satelitoj, oni facile povas rigardi la programaron de eksterlanda televido translandlime. Kaj pro la disvolviĝo de la komputilo, *Internet* (Interreto) tre rapide disvastiĝas.

Tial, nuntempe, multaj homoj havas kontakton kun eksterlandanoj kiuj parolas aliajn lingvojn. Oni ja reale komprenas ke la mondo tergloba estu la unusola. Sed la lingva baro obstine staras antaŭ ni same kiel en la epoko de Babelturo. Nur la elitoj inteligentaj en multaj landoj povos uzi la oficialajn lingvojn uzatajn en Unuiĝintaj Nacioj (ekzemple la anglan) kiel la internacian lingvon. Tamen tiuj lingvoj estas tro malfacile lerneblaj por ne-inteligentaj homoj, azianoj aŭ afrikanoj. Tio estus tute sama sento kiam eŭropanoj lernas ĉinajn literojn ideogramajn. Ĉu vi havas kuraĝon lerni 3000 ĉinajn literojn? Se oni devus elekti unu solan internacian komunan lingvon laŭ la tutmonda uzantaro de ĝi kiel gepatran lingvon, ĉiuj popoloj devus lerni la ĉinan lingvon. Tio estus terura afero por la eŭropanoj. Konsideru: tute samaj estas la oficialaj lingvoj de UN por ne-inteligentaj homoj, azianoj aŭ afrikanoj. Se mi rigardas ĉirkaŭ 200 personojn najbarajn en mia vilaĝo, neniuj povas paroli oficialan lingvon de UN.

Nun kelkaj gravaj problemoj minacas nian mondon, interalie: pliaĝiĝo de la socio; eksplodo de la nombro de loĝantoj; disrompo de la ĉirkaŭaĵo, polucio, dezertiĝo; aidoso, bova spongeca encefalopatio (frenezbova malsano); energio (kontrolado por atom-energio, petrolo, ktp); manko de manĝaĵoj, malsato; batalado inter gentoj aŭ religioj; perdiĝo de la vivcelo, psikologia malriĉiĝo.

Unue, la nombro de pliaĝuloj pli ol 60-jaraj rapide kreskas. Post 1955, la vivdaŭro tre rapide plilongiĝis. Nature pliaĝuloj jam ne laboradas post emeritiĝo. La proporcio de pliaĝuloj estas nuntempe ĉirkaŭ 15 procentoj de la tuta loĝantaro en la progresintaj landoj. Ĝi atingos 30 procentojn en 2050. Kiel oni prizorgos tiujn pliaĝulojn kiuj okupas trionon el la loĝantaro tutmonda, tio estas tre grava problemoj.

Due, oni timas la eksplodon de la nombro de la loĝantaro. Bonvole konsideru la fakton ke tio okazos ĉefe en Azio kaj Afriko.

Trie, la tutmonda nombro de la infektitoj de viruso HIV atingos 40 milionojn da homoj en la jaro 2000. Tio signifas ke unu el 100 personoj estos infektita. Ĉiutage, novaj 7500 infektitoj aperas, laŭ la Monda Organizo de Sano.

Ĉiu aŭskultanto facile povas kompreni la gravan rolon de edukado kaj klerigo por kontraŭbatali tiujn problemojn. Se oni parolus unu komunan lingvon, la edukado kaj klerigo fariĝus ege facilaj, kaj plue multaj volontuloj en la mondo povus kontribui por tia edukado kaj klerigo per unu komuna lingvo. Tio estos certe granda helpo al UN inkluzive de Unesko kaj MOS, ĉar la malmultaj laborantoj en tiuj organizaĵoj sole ne povos solvi la problemojn grandiozajn.

Mi deziras demandi al la laborantoj kaj oficistoj de UN jene: “Ĉu vi trinkas Koka-kolaon?” Eble ili respondus “jes”, kvankam UN neniam deklaris ke Koka-kola estas unu el la kvin oficialaj trinkaĵoj de UN.

Se multaj popoloj uzos Esperanton, la laborantoj en UN nature uzos Esperanton, same kiel la trinkaĵon Koka-kola. Tial, la rolo de UEA estas ne la peto pri akcepto de Esperanto kiel la oficiala lingvo en UN: ĝi devus esti la skuo al UN aŭ Unesko, pro kiu UN aŭ Unesko rekomendu lernadon de Esperanto al ĉiuj popoloj en la mondo, kaj helpus disvastigon de Esperanto mondscale.

Unue, Esperanto devus esti ne la internacia aŭ inter-registara lingvo, sed inter-popola aŭ inter-civitana lingvo. Se Esperanto disvastiĝos sufiĉe inter popoloj, tiam nature Esperanto kreskos al la inter-nacia aŭ inter-registara lingvo. Antaŭ cent jaroj, esperantisto estis nur unusola, Zamenhof, en la mondo, tamen nun miliono da esperantistoj troviĝas en la mondo. Post cent jaroj, certe la plejmulto de la popoloj estos esperantistoj, mi kredas.

La edukado por la pliaĝuloj estas tre grava. La edukado devas esti tutvivdaŭra. Kaj ĝi devas esti alirebla al ĉiu, ĉiam kaj ĉie. Por tiu celo, Esperanto-kurso estas tre oportuna. Ĝi donas al la lernantoj internacian pensmanieron. Ekster tiu vidpunkto, oni ne povas kontraŭbatali la suprediritajn gravajn problemojn. Ni estas nek politikistoj nek ministroj, do kiamaniere oni povos kontraŭbatali tiujn problemojn krom tra edukado kaj klerigo per la lingvo?

Aliflanke, oni devas rigardi la psikologian problemon. Multaj homoj, precipe la pliaĝuloj kaj 19 milionoj da rifuĝintoj, perdas la celon de sia vivo. En japana lingvo oni uzas la vorton *ikigai* por la celo de la vivo aŭ valoro de vivo. Por redoni *ikigai* al tiuj homoj, Esperanto estas certe utila, ĉar ni observis multajn personojn kiuj gajnis sian *ikigai* per Esperanto kiel s-ro AKITA Uĵaku (1883-1962), japana fama dramaturgo, kiu rezignis sinmortigon trovinte Esperanton.

Esperanto estas ne nur unu lingvo, sed ankaŭ la realiĝo de la ideo ke la neŭtrala internacia komuna lingvo estas nepre necesa. Kaj la rolo de Esperanto estu ŝanĝi la socion aŭ personon pli bonen per klerigo uzante sian lingvan forton. Per klerigo la socio aŭ homaro certe pliboniĝos. D-ro Zamenhof deziris ke Esperanto estu la realigilo de intergenta frateco kaj justeco en la mondo per reciproka interkompreniĝo.

Nu, mi deziras montri du bonajn ekzemplojn de klerigo per Esperanto. SAITO Hidekacu (1908-1940) kaj HASEGAWA Teru (plumnomo Verda Majo; 1912-1946) ambaŭ estis japanaj esperantistoj. Ili lernis Esperanton en la tridekaj jaroj kaj sciis la veran fakton pri la japana invado kontraŭ Ĉinio dum la Pacifika Milito pere de Esperanta korespondado. Ili batalis sole kontraŭ la japana registaro. S-ro Saitō eldonadis gazetojn en kiuj li kritikis, sub la nomo de lingva imperiismo, la perfortan uzadon de la japana lingvo en japanaj kolonioj. Li asertis ke ne-inteligentaj proletaranoj ne povos lerni malfacilan fremdlingvon, tial ili devus lerni Esperanton. F-ino Hasegawa edziniĝis kun ĉina esperantisto s-ro Liu Ren kaj iris al Ĉinio, tiam malamika lando kontraŭ Japanio. Ŝi elsendis per ĉina radio sian propagandon al japanaj soldatoj batalantaj en Ĉinio, uzante japanan lingvon kiel jene: “Forĵetu viajn pafilojn! La venko de Ĉinio en tiu ĉi milito signifas ne nur liberigon de la ĉina nacio, sed ankaŭ tiun de ĉiuj premataj popoloj en la Ekstrema Oriento inkluzive la japanan.”

Nuntempe, per japanaj tradukoj de Esperantaj verkoj, ni povis scii la mizeron de la milito. Kelkaj libroj pri Auschwitz, Hiroŝimo, Vjetnamio kaj Jugoslavio estis tradukitaj japanen el Esperanta eldono. Nur per tiuj libroj, ni povis scii la faktojn.

La 19-a kaj 20-a jarcentoj estis erao de liberiĝo por la homaro. Dum miloj da jaroj la homaro suferadis pro multaj piedo-katenoj kaj diskriminacio. Markso (1818-1883) deziris liberigi la homaron el ekonomia kateno. Freŭdo (1856-1939) volis liberigi la homaron el senkonscia kateno. Lazaro Ludoviko Zamenhof (1859-1917), la kreinto de Esperanto, deziris liberigi la tutan homaron el lingva kateno. Franca verkisto, Nobel-premiito, Romain Rolland (1866-1944) diris “Esperanto estas la armilo por liberigi la homaron.”

Esperanto celas plibonigi la tutan mondon per lingva komunikado, edukado, kaj klerigo, sed ne per perforta revolucio aŭ milito. Rusa novelisto Lev Tolstoj (1828-1910) skribis “Lernado de Esperanto kaj ĝia disvastiĝo sendube . . . helpas al kreo de la Dia Regno, la plej ĉefa kaj sola destino de la homa vivo.”